

Rau qhov Vajtswv twb muab ncej muab nqaj tsa cia lawm. Tej ncej tej nqaj ntawd yog Yexus Khetos. Tsis muaj leejtwg yuav muab tau ncej tau nqaj txhos ntxiv rau.

Muaj qee leej yuav nqa nyiaj, nqa kub, nqa tej hlaws iav muaj nqis tuaj vov thiab tuaj xov rau. Muaj qee leej ho yuav nqa nqeeb, nqa ntoo, nqa quavniab tuaj vov thiab tuaj xov rau.

Thaum txog hnuv Yexus Khetos rov qab los, peb yuav pom tej haujlwm uas sawvdaws tau ua los lawm saib zoo li cas. Rau qhov hnuv ntawd yuav muaj hluavtaws sim txhua tus tej haujlwm saib puas ruaj puas khov.

Tej uas sawvdaws nqa tuaj vov thiab tuaj xov rau, yog leejtwg li tsis kub hnyiab, tus ntawd thiaj yuav tau nqi zog.

Tiamsis yog leejtwg tej haujlwm kub hnyiab tag lawm yuav nkim tus ntawd lub dag lub zog xwb. Txawm yog li ntawd los, nws yuav dim thiab, tiamsis nws yuav dim ib yam li tus uas khiav dim hauv hav hluavtaws los xwb. (I Kaulithaus 3:8-15)

378

COV NTSEEG

Kuv yog tus Povlauj uas Vajtswv tsa ua Yexus Khetos ib tug tubtxib. Kuv sau tsab ntawv no xa tuaj rau nej cov uas yog Vajtswv haivneeg hauv lub moos Efexaus uas muab siab rau nrog Yexus Khetos koom ib txogsia.

Thov tus Vajtswv uas yog peb Txiv, thiab Tswv Yexus Khetos hluv nej thiab pab kom nej tau zoo nyob kajsiaib lug.

Peb cia li ua tus Vajtswv uas yog peb tus Tswv Yexus Khetos Txiv tsaug. Vim peb nrog Yexus Khetos koom ib txogsia, Vajtswv thiaj li foom ib puas tsav yam koobhmoov qaum ntuj Ceebtsheej rau peb.

Puag thaum tsis tau tsim ntiajteb, Vajtswv twb xaiv peb cov uas nrog Yexus Khetos koom ib txogsia los ua nws tug lawm, kom peb ua tau neeg zoo kawg nkaus tsis muaj ib qho txhaum hlo li rau nws ntsia ntsoov.

Vim Vajtswv hluv peb, Vajtswv thiaj xub xav tseg lawm hais tias, Vajtswv yuav kom Yexus Khetos los yuav peb mus ua Vajtswv cov menyuam. Qhov ntawd haum Vajtswv siab, thiab raws li Vajtswv twb xav tseg lawm.

Peb cia li qhuas tus Vajtswv uas muaj nploosiaib hluv txib Yexus Khetos, tus uas yog nws tus Tub uas nws hluv los cawm peb.

Vim Yexus Khetos tuag theej peb lub txhoj, Vajtswv thiaj zam peb tej kev txhaum. Vajtswv yog tus muaj nploosiaib hluv peb heev kawg nkaus li.

Tus Vajtswv uas muaj tswvyim thiab paub ib puas tsav yam txib Yexus Khetos los qhia peb paub Vajtswv txoj haujlwm uas nws twb xav tseg puag